



Als Naar bisch nie elai

Naare hänn z Basel Tradizioon
 mir mache noo so gärn dr Gloon
 scho uff em Naareschiff vom Sebaschtian Brant
 isch alles komplett in Naarehand:
 Biechernaare, Modenaare, jungi und au
 alti Naare, gyzigi und schenereesi
 mänggmol liebi, mänggmol beesi.
 Zer Fasnachtszyt, es isch famoos
 drifft me si alli uff dr Stroos.
 Au d J.B.-Glygge, s isch z erwarte
 isch underwägs mit allne Garde,
 s git uns jo schliesslig, jo s isch woor
 tatsächlich scho syt hundert Joor.
 Me sott sich zwoor nit sälber loobe
 sone Jubeljoor isch nit numme Spass.
 Trotdäm sinn mir vom Morge bis am Oobe
 alli als Naare uff dr Gass.
 Laider falle mit gar nit uff –
 wänn de ummeluegsch, mainsch haigsch e Suff.
 D Basler Bolittiker, s isch e Gruus
 versammle sich im roote Huus,
 woorschynlig zem in Rueh go pfuuse
 denn ebbis Gscheits kunnt sälte uuse.

E Druurspiil sinn d Museumsgschichte
 pro Wuche ai Skandal gits z brichte.
 Hoffentlig gheert d Frau Ackermäa
 au bald emol de Historie aa –
 oder sait me Ackerfrau?
 gendermässig gieng das au.
 D Sproochbolizei hett sicher Fraid
 die liebe Wörter im neie Glaid.
 De Sutterbegg kaa e Lied drvoo singe,
 Maitlibai derf är nimme bringe.
 Gliggsbringer haissts jetz statt Maitlibai,
 de seesch; als Naar bisch nie elai.

S greschti Naaresortimänt
 isch im Internet präsent.
 Goots dr aimol total schyter
 goosch am beschte grad uff Twitter
 und losch dy Fruscht im Netz kursiere.
 Au wenn dr greescht Mischd duesch verschigge
 s git immer ain, wo uff «like» duet kligge.
 Denn uff «Social Media»
 driffsch di schlimmschte Däppe aa.

Iber Wälpolitigg, das waiss e jeede
 duet me z Basel nit gärn reede.
 Mir hänn Naare gnueng im grosse Root
 bi de maischte ischs fyr d Rettig zspoot.
 Jetzt Nämme ufflischte wär nit so toll
 do wär jo der ganzi Zeedel voll!
 Hingege uffem internäschenel Bargett
 findsch e richtigs Gruuselkabinett:
 Putin, Erdogan und Trump
 und das ganzi anderi Glump
 Assad, Maduro und dr Johnson au
 versaue di ganzi Tagesschau.
 Drum schaltisch um uf Tele Basel
 doch bi däne ihrem Gfasel
 stellsch d Kischte ab und dänggsch ei ei ei:
 Als Naar bisch wirgglig nie elai!